

ӨВӨРХАНГАЙ АЙМГИЙН ЗАСАГ ДАРГЫН ТАМГЫН ГАЗАР

ЗӨВЛӨМЖ

2024 оны 01 дүгээр сарын 10-ны өдөр

Арвайхээр

Баруунбаян-Улаан сумын Засаг даргын Тамгын газрын
2023 оны үйл ажиллагааны үр дүнд хийсэн хяналт-шинжилгээ
үнэлгээний тухай

БОДЛОГЫН БАРИМТ БИЧГИЙН ХЭРЭГЖИЛТИЙН ҮНЭЛГЭЭ

Хууль тогтоомж, тогтоол шийдвэрийн хэрэгжилт:

-Хууль тогтоомж, тогтоол шийдвэрийг хяналтад авах үйл явцын хувьд аймгийн Засаг даргын 2015 оны а/149 дүгээр захирамжийн дагуу хийгдэхгүй, мөрдөгдөхгүй байна. Бүртгэл хяналтын үйл ажиллагаа хангалтгүй, 2023 онд шинээр бүртгэл хяналтад авагдсан шийдвэр байхгүй дутагдалтай байна.

Журмаар бүртгэлийн дэвтэр хөтөлж, хяналт тавьж ажиллахаар зохицуулагдсан тул мөрдөж ажиллах шаардлагатай. Хууль тогтоомж, тогтоол шийдвэрийн цахим мэдээллийн сангийн бүрдүүлэлт хангалтгүй байна гэж үзлээ. Цахим мэдээллийн сан нь холбогдох шийдвэрийн хяналтад авагдсан болон хяналтаас хасагдсан байдал, тухайн шийдвэрийн хэрэгжилт тогтмолжсон эсэх, хүчингүй болсон эсэх гэх мэтээр он оноор ангилах, бүртгэлийг сайжруулахад чиглэгдэж байгаад анхаарах. Иймд байгууллага бүрээр цаашид хууль тогтоомж, тогтоол шийдвэрийн бүртгэл хяналт, цахим сангийн бүртгэлийг хийж ажиллах шаардлагатай байна.

-Шинээр мөрдөгдөж байгаа хуулийн хяналт, бүртгэлийг нэмэгдүүлж, эзэнжүүлэх, хэрэгжилтийг тайлагнасан байхад анхаарах. Энэ чиглэлээр бусад байгууллага, албан хаагчдыг арга зүйгээр хангаж ажиллах.

-Хууль тогтоомж, тогтоол шийдвэрийн хэрэгжилтийн тайлагналт хэт нуруу, задгай бичигдсэн байна. Цаашид тайлагналтыг үр дүн, үр нөлөөнд тулгуурлаж бичих чадварт бүх албан хаагчдыг сургах, чадавхжуулахад анхаарах.

-Тайлангийн үнэлгээг маш хийсвэр, бодитой бус, биелэлт нь арга хэмжээтэй харилцан уялдаа хангалтгүй зэрэг дутагдал байгаад дүгнэлт хийж, тайлангийн чанарт анхаарах шаардлагатай байна.

Аймгийн Засаг даргын үйл ажиллагааны хөтөлбөр, аймгийн хөгжлийн жилийн төлөвлөгөөний хэрэгжилт:

Аймгийн Засаг даргын үйл ажиллагааны хөтөлбөрийн хэрэгжилтийг 92.6 хувиар дүгнэснийг хяналт-шинжилгээ, үнэлгээний ажлын хэсгээс 91.0 хувь болгон бууруулж дүгнэсэн байна. Аймгийн хөгжлийн жилийн төлөвлөгөөний хэрэгжилтийг 95.2 хувиар үнэлснийг хяналт-шинжилгээ, үнэлгээний ажлын хэсгээс 92.0 хувь болгон буурууллаа.

Аймгийн Засаг даргын үйл ажиллагааны хөтөлбөрийн хүний хөгжлийн бүлэгт төлөвлөсөн зорилт, арга хэмжээний тодорхой заалтуудыг чанартай, үр дүнтэй гүйцэтгэж ажилласан байна.

Үндэсний бахархал, өв соёлын бүлэгт угийн бичгийн хөтлөлт, монгол бичгийн ур чадварыг нэмэгдүүлэх ажил сум орон нутагтаа тодорхой хэмжээнд хангалттай хийж гүйцэтгэсэн бөгөөд өрх бүрт угийн бичгийн дэвтрийг тарааж 336 иргэн угийн бичиг хөтөлсөн явдал нь зэргэлдээ сумдуудтай харьцуулахад харьцангуй өндөр үзүүлэлттэй харагдаж байна. Мөн Соёлын төв нь номоор дамжуулж соён гэгээрүүлэх, соёлын ваучераар хүүхдүүдэд үйлчлэх,соён

гэгээрүүлэх ажилд санаачилга гаргаж улсдаа тэргүүн байр эзэлсэн явдлыг онцлон сайшааж байна. Мөн сумын Соёлын төвийн албан хаагчид, сургуулийн хөгжмийн багш хүүхдүүдийн хамтарсан ардын урлагийн нэгдсэн үзүүлбэрийг Франц улсын 3 хотод олон удаагийн давталттайгаар тоглож ардын урлагийг сурталчилсан явдал нь олон улсад зохион байгуулсан маш том соёлын эвент боллоо гэж үзэж байна. Энэ нь гадаад хамтын ажиллагааг нэмэгдүүлэх Монгол улсыг сурталчилах томоохон ажлын нэг болсон гэж үзлээ. Цаашид Соёлын төвийн дуу хөгжмийн багшийг орон тоогоор ажиллуулах, хүрсэн түвшнээсээ ухрахгүй улам бүр амжилт гаргаж ажиллах, аман өвийн дугуйланг хичээллүүлэх шаардлагатайг зөвлөж байна.

Эрүүл мэндийн салбарт орон тоо хүний нөөцийн хувьд хангалттай, ажиллах орчин нөхцөл сайжирч, ажиллагсдын сэтгэл ханамж дээшилсэн нь ажлын ахиц үр дүнд нөлөөлсөн гэж үзэж байна. Тухайлбал үзлэг оношилгоо эрт илрүүлэлтийн хувь сайжирсан, мобайл технологи болон UP TO DATE технологийг ашиглаж байгаа байдал, анхан шатны шилжилгээ, өсвөр үе рүү чиглэсэн эрүүл мэндийн боловсрол олгох ажил чанартай, хүртээмжтэй хэрэгжүүлсэн гэж үзэж байна. Цаашид гүйцэтгэлийн санхүүжилтийг улам бүр оновчтой шийдвэрлэх, хүний нөөцийг тогтвортой барих, нийгмийн асуудал дээр анхаарч ажиллахыг зөвлөмж болгож байна. Мөн шүдний эрүүл мэндийн талаар хүүхэд багачууд болон насанд хүрэгчдийн дунд хүртээмжтэй ажлыг зохион байгуулах, цэргийн насны эрчүүдийн эрүүл мэнд, мөн сэтгэцийн эрүүл мэнд рүү чиглэсэн хорт зуршилтай холбоотой ажил үйлчилгээ, гэрийн асаргаа сувилгааг жигдрүүлж ажиллах нь зүйтэй. Цаашид мэргэжлийн боловсон хүчнийг тогтвор суурьшилтай ажиллуулах, нийгмийн баталгааг хангах, дутагдалтай байгаа нэг эмчийн орон тоог яаралтай нөхөх, сувилагчийг бэлтгэх зэрэг хүний нөөцтэй холбоотой ажлуудыг зохион байгуулж ажиллахыг зөвлөж байна.

Ерөнхий боловсролын сургуулийн хувьд говийн бүсийн төв сургуулиар ажиллаж байгаа бөгөөд 432 сурагчтай, 57 цагш ажиллагсадтай үйл ажиллагаагаа явуулж байна. Сургууль алсын хараа эрхэм зорилгоо оновчтой тодорхойлсон бага дунд, ахлах бүлгүүдийн сурагчдын эзэмших ёстой ур чадвар, төлөвшил хүмүүжлийг онцлог бүрт нь оновчтой тодорхойлсон, ISO-гийн стандартад дүйцэхүйцээр схемчилсэн төлөвлөлт, цагийн хуваарийн зохицуулалт менежментийг баталж, ил тод байршуулсан явдал нь сайн жишээнд дурдаж болохоор байна. Мөн түүнчлэн аймгийн Шатар хөтөлбөрийг хэрэгжүүлэх ажлын хүрээнд сумын удирдлагын зүгээс санаачлага гарган бүх нийтийн оролцоог хангаж, тэр дундаа ЕБСургууль манлайлан оролцож, аймгийн түвшинд тэргүүлж байгаа онцлон дурдах нь зүйтэй гэж үзэж байна.

Цаашид элсэлтийн ерөнхий шалгалтын түвшинг ахиулах тусгай хөтөлбөр хэрэгжүүлэх, сургууль болон дотуур байрны орчин нөхцөл, хатуу зөөлөн эдлэлийг шинэчлэх, сайжруулах, цэвэр бохир усны инженерийн шийдлийг бий болгох, багш нарын өрөөг яаралтай шинэчлэн засварлах, багшийг ажлын байран дээрээ хөгжих, тогтвор суурьшилтай ажиллах нөхцөлийг бүрдүүлэхэд санаачлагатай ажиллахыг зөвлөж байна. Сургуулийн өргөтгөлийг бариулах, урлаг заал, цайны газар, бага сургуулийн хэсгийг бий болгож ажиллахад сум орон нутгийн удирдлага санаачлага гарган аймгийн төлөвлөлтөд оруулах хэрэгтэй байна. Дутагдалтай багшийн орон тоог нөхөх, орон нутгийн онцлогт нийцсэн бодлогыг боловсруулж ажиллах шаардлагатай байна.

Сургуулийн номын сангийн үйл ажиллагаа тогтмолжуулж, сурагчдыг уншихуйн дадалд сургах, уншихаар дамжуулан хөгжүүлэх асуудалд анхаарах, хүүхдүүдийн төлөвшил хүмүүжилд чиглэсэн, суурь хүмүүжилд анхаарсан, хөгжлийн хөтөлбөрийг хэрэгжүүлэх, багш айлчлалаар дамжуулан эрсдэлтэй хүүхдүүдийг тодруулах, туслах дэмжих, хорт зуршлаас сэргийлэх ажлуудыг нэн тэргүүнд зохион байгуулж ажиллах.

Сургуулийн өмнөх боловсролын байгууллагын хувьд харьцангуй стандарт хангасан сайн үйл ажиллагаатай байна. Хүний нөөцийн бүрдэл хангалттай, сургалт хөгжлийн үйл ажиллагаа хэвийн явагдаж байна. Цаашид тоглоом, зөөлөн эдлэлийг шинэчлэх, сайжруулах, багш нарын ур чадварыг ажлын байранд дээр нь өсгөх, хөгжих арга хэмжээг тасралтгүй авч аймгийн болон улсын тэргүүний цэцэрлэг болох зорилт тавьж ажиллахыг зөвлөж байна.

Хүүхэд хамгааллын хүрээнд дотуур байрны камеруудыг нэмэх, хүчин чадлыг сайжруулах, гараас гарт зарчмыг хэрэгжүүлэх, БШУГазрын дотуур байрны журналыг бүрэн

дүүрэн хөтөлж хэвшихийг зөвлөө. Мөн боловсролын байгууллагын гал тогооны тоног, төхөөрөмжийн хүчин чадлыг нэмэгдүүлэх шаардлагатай бөгөөд өглөөний цай, үдийн хоол, дотуур байрны хүүхдийн хоол хүнсний нэр төрөл, цэсийг баяжуулж, чанар шим тэжээлийг нэмэгдүүлэх тал дээр санаачлагатай судалгаатай ажиллахыг зөвлөж байна.

Хөдөлмөр, нийгмийн хамгааллын салбарын хүрээнд түр болон байнгын ажлын байр 104-г бий болгосон байна. Цаашид байнгын ажлын байрыг нэмэгдүүлэх, шинэ сэргэлтийн бодлогын хүрээнд шинээр үйлчилгээ, үйлдвэрлэлийг нэмэгдүүлэх, хүн амыг татан төвлөрүүлэх, эдийн засгийг тэлэх тал дээр тусгай төлөвлөлт гаргаж үйл ажиллагааг хэрэгжүүлэх шаардлагатай байна.

Мөн сүүлийн жилүүдэд хүнсний талон авдаг иргэдийг 40-өөс 26 болгож бууруулсан, ахмадын зөвлөх үйлчилгээг 3 чиглэлээр хэрэгжүүлж байгаа нь сайшаалтай байна. ХАБЭАЗөвлөлийн үйл ажиллагааг суманд эрчимжүүлж, аливаа эрсдлээс урьдчилан сэргийлэх, Нэг өрх-Нэг ажлын байр хөтөлбөрийг эрчимжүүлэх шаардлагатай байгааг зөвлөж байна.

Аймгийн Засаг даргын үйл ажиллагааны хөтөлбөрийн эдийн засгийн бүлэгт төлөвлөсөн үйл ажиллагаанууд хугацаандаа хийгдэж, зорилтот жилийн үйл ажиллагаатай уялдуулан хийсэн ажлууд нь үр дүнтэй хэрэгжсэн байна гэж үзлээ. Сумын хэмжээнд 433.0 сая төгрөгийн орлого бүрдүүлэхээс 100 хувь татан төвлөрүүлж амжилттай ажилласан байна.

Аймгийн Засаг даргын үйл ажиллагааны хөтөлбөрийн Засаглалын бодлогын хүрээнд төлөвлөсөн үйл ажиллагаануудыг цаг хугацаанд нь хуулийн хүрээнд хэрэгжүүлж ажилласан байна. Ёс зүй хариуцлагатай төрийн албыг бэхжүүлэх хүрээнд ёс зүйн зөрчил гаргасан албан хаагч байхгүй байгаа бөгөөд цахимд суурилсан төрийн үйлчилгээг орон нутгийн түвшинд үр дүнтэй хэрэгжүүлэх анхаарах шаардлагатай байна.

Эрх зүйн боловсролтой иргэн, авлигагүй засаглалыг хөгжүүлэх ажлын хүрээнд аймгаас дэвшүүлсэн бодлого хөтөлбөрийг хангалттай хэрэгжүүлж ажилласан байна. Аймгийн Улаан загалмайн хороотой хамтарч төрийн хүмүүнлэгийн үйл ажиллагааг орон нутагт хэрэгжүүлэхэд идэвх санаачилгатай ажиллах, тухайлбал аварга малчдыг сонгохдоо Улаан загалмайн нийгэмлэгийн гишүүн байхыг шаардаж хүмүүнлэгийн чиг баримжаа олгодог байхыг зөвлөж байна.

Аймгийн Засаг даргын үйл ажиллагааны хөтөлбөрийн ногоон хөгжил, аялал жуулчлалын хүрээнд төлөвлөсөн үйл ажиллагааг хангалттай хэрэгжүүлж ажилласан гэж үзэж байна. Тухайлбал заг үржүүлгийн технологийг хөгжүүлж, 30 мянган заг үржүүлснээр 6 га-д 8000 заг тарьсан нь 100 хувийн ургалттай байна. Мөн услалтын системийг сумын өөрийн хөрөнгөөр шийдэж, ургуулсан мод бутыг арчилж хамгаалах, гэрээт ажилтан томиолж, 1 сая төгрөгөөр цалинжуулан ажилласан нь уг ажлыг үр дүнд хүрэхэд чухал ач холбогдолтой арга хэмжээ болжээ гэж үзлээ.

Аялал жуулчлалын салбарыг хөгжүүлэхийн тулд шинэ сэргэлтийн бодлогын хүрээнд шилжин ирэгсдэд сумын онцлог брэнд болох элсний эмчилгээ үйлчилгээг дагнан хөгжүүлэх чиглэлээр дэмжлэг үзүүлсэн байна. Цаашид аялал жуулчлалын маршрутын шинэ зам боломжийг нээхэд санаачилгатай ажиллах, элсний эмчилгээг нутгийн брэнд үйлчилгээ болгох, инноваци шингэсэн бүтээгдэхүүн үйлдвэрлэлийг бий болгоход анхаарч ажиллах шаардлагатай байна.

БАЙГУУЛЛАГЫН ЧИГ ҮҮРГИЙН ҮЗҮҮЛЭЛТИЙН ҮНЭЛГЭЭ

Аймгийн Засаг даргаас сумын Засаг даргатай байгуулсан гэрээний үүргийн биелэлт:

Засаг даргатай байгуулсан гэрээний хэрэгжилтийг орон нутагтаа сайн зохион байгуулсан. Гэрээний биелэлтийг орон нутгаас 94.2 хувиар дүгнэсэн бөгөөд хяналт-шинжилгээ, үнэлгээний ажлыг хэсэг 89.0 хувийн хэрэгжилттэй гэж дүгнэлээ. Гэрээний хэрэгжилтийг тайлагнахдаа шалгуур үзүүлэлтийг зөрүүлж томьёолсон, хүрэх түвшингээ тодорхойлоогүй, тайлагналтын чанар хангалтгүй байна. Цаашид албан үгээр цэгцтэй,

шалгуур үзүүлэлтэд тулгуурлан, хүрэх түвшинтэй харьцуулан оновчтой тайлагнахад анхаарах шаардлагатай байна.

Төрийн албан хаагчийн сургалт, ажиллах нөхцөл, нийгмийн баталгааг хангах хөтөлбөрийн биелэлт:

Төрийн албан хаагчдыг сургах, чадавхжуулах, нийгмийн баталгааг хангах хөтөлбөрийн хэрэгжилтийг хяналт-шинжилгээ, үнэлгээний ажлын хэсгээс 90.0 хувиар дүгнэлээ.

Ажлын байран дээр хөгжих сургалтад хувь хүний хөгжил рүү чиглэсэн арга хэмжээг төлөвлөн хэрэгжүүлэх, төрийн албан хаагчдын ажиллах нөхцөлийг сайжруулах, эрүүл идэвхтэй ажиллаж амьдрах нөхцөлийг сайжруулахад чиглэсэн арга хэмжээг авч хэрэгжүүлэх шаардлагатайг зөвлөж байна.

Мөн ажлын байран дээр тасралтгүй хөгжих сургалтын чанар, хүртээмжийг сайжруулах, үр дүнг дээшлүүлэх, төрийн үйлчилгээний ажилтнууд, суманд шинээр төрийн албанд шинээр орж байгаа залуучуудад зориулсан сургалт, нийгмийн баталгааг хангах хөтөлбөр, байгууллагын хөдөлмөрийн дотоод журам зэрэг холбогдох баримт бичгүүдийг танилцуулах ажлыг тогтмол зохион байгуулж ажиллахыг зөвлөж байна.

Засаг даргын Тамгын газар болон бусад төсөвт байгууллагуудын гүйцэтгэлийн төлөвлөгөөний биелэлт:

Байгууллагын гүйцэтгэлийн төлөвлөгөөний хэрэгжилт үр дүнг 93.5 хувийн хэрэгжилттэй дүгнэлээ. Орон нутагт баримталж буй бодлогын баримт бичгүүдэд тусгагдсан зорилт, арга хэмжээг гүйцэтгэлийн төлөвлөгөөнд тусгаж ажилласан хэдий ч тайлангийн хэрэгжилт нь тухайн арга хэмжээтэй уялдаа муутай, оновчгүй байгаад анхаарах.

Байгууллагын гүйцэтгэлийн төлөвлөгөөг боловсруулахдаа орон нутгаас баримталж байгаа холбогдох бодлогын баримт бичгүүдтэй уялдуулан төлөвлөсөн сайн талтай. Төлөвлөлтийг хийхдээ цаашид аймгаас өгсөн чиглэл, арга хэмжээний төлөвлөлтийг өөрийн сум орон нутгийн онцлогт нийцүүлэн томъёолоход анхаарах.

- Бодлогын баримт бичиг, хууль тогтоомж, тогтоол шийдвэр, стратеги төлөвлөгөөнд тусгагдсан ижил нэршилтэй, ижил утгатай, бие биеэ агуулсан утгатай зорилт, арга хэмжээг нэгтгэж, нэг арга хэмжээ болгон тодорхойлох;

- Байгууллагын гүйцэтгэлийн зорилт, арга хэмжээг бусад нэгж, эсхүл өөрийн нэгжийн албан хаагчтай хамтран хэрэгжүүлэх болсон тохиолдолд тухайн албан хаагч арга хэмжээ, түүний шалгуур үзүүлэлтийг дангаараа хэрэгжүүлж болохуйц байдлаар нарийвчлан тодорхойлж, гүйцэтгэлийн төлөвлөгөөнд тусгах;

- Гүйцэтгэлийн зорилт, арга хэмжээний шалгуур үзүүлэлтийг тодорхой, хэмжигдэхүйц, хэрэгжихүйц, ач холбогдолтой, цаг хугацаатай, нэг арга хэмжээнд 2-оос доошгүй байхаар тодорхойлох;

-Байгууллагын гүйцэтгэлийн төлөвлөгөөнд (Тамгын газрын) бодлого зохицуулалтын хүрээний гол арга хэмжээний төлөвлөлтүүдийг хийдэг байх (албан хаагч тус бүрийн гүйцэтгэлийн төлөвлөгөөнд нарийвчилсан арга хэмжээнүүд орж байгаа учраас үйл ажиллагаа нэг бүрийг тусгах шаардлагагүй)

-Албан хаагчийн болон байгууллагын гүйцэтгэлийн төлөвлөгөөнд төсөв тавигдсан арга хэмжээнүүд байгаа бөгөөд гүйцэтгэл үр дүнд тухайн төсвийн гүйцэтгэлийг тусгаагүй байна.

-Төсөвт байгууллагуудын гүйцэтгэлийн төлөвлөгөөний боловсруулалт, төлөвлөлтөд хяналт тавих, арга зүйгээр хангах. Арга хэмжээг оновчгүй тодорхойлсон, шалгуур үзүүлэлтийг хэмжигдэхүйц байх шаардлагыг хангаагүй, суурь түвшин тавигдаагүй, зорилтот түвшинг ойлгомжгүй тодорхойлсон, зэрэг дутагдлыг дахин гаргахгүй байх.

-Төсөвт байгууллагуудын гүйцэтгэлийн төлөвлөгөөний боловсруулалтад сайтар анхаарах, гүйцэтгэлийн дүгнэх үнэлгээний системийг сайтар судлах шаардлагатай байна.

Орон нутгийн хөгжлийн сан, хөрөнгө оруулалтын талаар хэрэгжүүлсэн үйл ажиллагаа, хоршоо хөгжүүлэх сангийн эргэн төлөлтийн хувь:

Орон нутгийн хөгжлийн сан, хөрөнгө оруулалтын талаар хэрэгжүүлсэн үйл ажиллагаа, Хоршоо хөгжүүлэх сангийн эргэн төлөлтийн үнэлгээг 82.5 хувийн хэрэгжилттэйгээр дүгнэсэн.

Орон нутгийн хөгжлийн сангийн үйл ажиллагаа, үр дүнг тухай бүр сайтаар дамжуулан иргэдэд нээлттэй, тогтмол мэдээлдэг байхад анхаарах шаардлагатай.

БАЙГУУЛЛАГЫН НЭЭЛТТЭЙ БАЙДЛЫН ҮНЭЛГЭЭ

Байгууллагын ил тод, нээлттэй байдлын хэрэгжилтийн үнэлгээ:

Бодлогын баримт бичгийн хэрэгжилт, захиргааны байгууллагын үйл ажиллагаанд хяналт-шинжилгээ, үнэлгээ хийх нийтлэг журмын 9 дүгээр хавсралтаар батлагдсан “МЭДЭЭЛЛИЙН ИЛ ТОД, НЭЭЛТТЭЙ БАЙДЛЫН ХЭРЭГЖИЛТИЙГ ТАЙЛАГНАХ ХҮСНЭГЛТ”-ээр чиг үүргийн, үйл ажиллагааны стратеги, зохион байгуулалтын талаарх мэдээллийн ил тод, нээлттэй байдал, хүний нөөцийн мэдээллийн ил тод, нээлттэй байдал, төсөв санхүү, худалдан авах ажиллагаа, үзүүлж байгаа үйлчилгээ, бусад мэдээллийн ил тод, нээлттэй байдал гэсэн гэсэн үзүүлэлтийн дагуу 93.0 хувийн хэрэгжилттэйгээр дүгнэв.

Тус сумын ил тод байдлын шалгуур үзүүлэлтийн жилийн эцсийн хэрэгжилтийн тайланд үндэслэж, бодит нөхцөл байдлыг газар дээр нь судалж, вэб сайт, мэдээллийн самбарын хөтлөлт, баяжилтыг харгалзан үзсэн.

Албан ёсны вэб сайтыг хөгжүүлэлтийг сайжруулж, мэдээллийн шинэчлэлийг тогтмол хийх, төсөвт байгууллагуудын мэдээллийг сайтаар дамжуулан иргэд олон нийтэд түгээхэд анхаарах шаардлагатай гэж үзлээ.

Цаашид иргэдээс санал асуулгыг цаасан болон цахим хэлбэрээр авч хэвших, түүнд иргэдийн оролцоог хангалттай бүрдүүлж ажиллахад анхаарах .

Шударга байдлын түвшний үнэлгээ:

“Сум, байгууллагын авлигийн эсрэг үйл ажиллагаа, Авлигатай тэмцэх үндэсний хөтөлбөрийн зорилт арга хэмжээг хэрэгжүүлэх 2023 оны төлөвлөгөө”-ний жилийн эцсийн биелэлтийг аймгийн Засаг даргын Тамгын газрын Хууль, эрх зүйн хэлтсээс үнэлсэн шударга байдлын үнэлгээтэй харгалзан газар дээр нь дүгнэсэн бөгөөд 90.0 хувийн хэрэгжилттэйгээр үнэлэв.

Цаашид:

- Авлигаас урьдчилан сэргийлэх, соён гэгээрүүлэх чиглэлээр өөрсдийн нөөц бололцоог ашиглаж шторк, видео бэлтгэж сумын албан ёсны вэб сайтыг мэдээллийг тогтмол шинэчлэн байршуулдаг байх, нөлөөллийн ажлуудыг санаачлан зохион байгуулж, иргэдийг оролцоог нэмэгдүүлэх

- Авлигийн эсрэг үйл ажиллагааны төлөвлөлтийг сайжруулж, үр дүнг тооцож ажиллах

- Хэрэглэгчийн сэтгэл ханамжийн судалгааг иргэдээс авч хэвших, түүний мөрөөр ажил сайжруулах, алдаа дутагдлаа тухай бүрт нь засах

- Авлига, ашиг сонирхлын эсрэг хууль, тогтоомж, дүрэм журмыг сумын төрийн албан хаагчдад сурталчлан таниулах, авлигаас ангид байх сургалт, зөвлөгөөнд төрийн албан хаагчдыг хамруулахад анхаарах.

Шилэн дансны хөтөлөлтийн үнэлгээ:

Шилэн дансны хөтөлөлтийн үнэлгээг аймгийн Засаг даргын эрхлэх асуудлын хүрээний агентлаг Санхүүгийн хяналт, дотоод аудитын хэлтсээс ирүүлсэн үнэлгээнд тулгуурлан үнэлсэн бөгөөд 93.0 хувийн хэрэгжилттэйгээр дүгнэлээ.

Цаашид нийтлэг гарч буй алдааг давтан гаргахгүй байхыг бүх шатны төсвийн байгууллагууд, мэдээлэл оруулах эрх бүхий албан хаагчид анхааран ажиллах шаардлагатай.

-Аймгийн Засаг даргын эрхлэх асуудлын хүрээний агентлаг Санхүүгийн хяналт, дотоод аудитын албанаас өгч буй дүгнэлт, зөвлөмжийг тухай бүр хэрэгжүүлж, хамтран ажиллах, мэргэшлийн зөвлөгөө авах,

-Хөрөнгийн болон урсгал зардалд тусгагдсан арга хэмжээний тендерийн ерөнхий мэдээллийг бүрэн оруулж ажиллахад анхаарах шаардлагатай.

Хяналт-шинжилгээ, үнэлгээний зөвлөмжийн биелэлт:

Хяналт-шинжилгээ, үнэлгээний зөвлөмжийн хэрэгжилт үр дүнг 90.0 хувийн хэрэгжилттэйгээр дүгнэлээ.

Зөвлөмжийн мөрөөр хэрэгжүүлэх гүйцэтгэл сайжруулах төлөвлөгөө боловсруулан ажилласан. Төлөвлөгөөний хэрэгжилтийг тооцож ажилласан сайн талтай.

Цаашид төрийн албан хаагч бүр хариуцсан ажлын хүрээнд судалгаа, мэдээллийн сантай байх, ажлын байран дээр суралцах нөхцөлийг бүрдүүлж, ур чадвараа нэмэгдүүлэхэд анхаарах.

- Архив, албан хэрэг хөтлөлтийн талаарх Засгийн газрын 2020 оны 12 дугаар сарын 30-ны өдрийн 246 дугаар тогтоолоор батлагдсан Албан хэрэг хөтлөлтийн нийтлэг журам, Стандарт, хэмжил зүйн газрын даргын 2021 оны 07 дугаар сарын 02-ны өдрийн С/30 дугаар тушаалаар батлагдсан Баримт бичиг стандарт (MNS 5140:2021)-ын хэрэгжилтийг хангах чиглэлээр бүх албан хаагчдын мэдлэгийг бататгах, чадавхжуулахад анхаарах. Тухайлбал: Хуралдааны тэмдэглэл, зөвлөмж, илтгэх хуудас зэргийг стандартын шаардлагад нийцүүлэх,

- Албан хэрэг хөтлөлтийн чиглэлээр аймгийн Засаг даргын Тамгын газрын Хууль, эрх зүйн хэлтсийн Архивын тасгаас нэгдсэн заавар зөвлөгөө авах ажлыг сумын хэмжээнд үр дүнтэй зохион байгуулах,

- Төсөвт байгууллагуудыг сумын Засаг даргын Тамгын газраас арга зүйн зөвлөмж, үйл ажиллагааны чиглэлээр сайтар хангаж ажиллах, сургалт мэдээллийг тогтмол хийж байх.

- Шинээр томилогдож байгаа албан тушаалтанг шаардлагатай мэдээ, мэдээллээр хангах, чиглүүлэх үйл ажиллагааг байгууллага бүр хэрэгжүүлж ажиллах.

Хөдөөгийн сэргэлт бодлогын хүрээнд орон нутагт хэрэгжүүлсэн үйл ажиллагааны үр дүн, хэрэгжилт:

Хөдөөгийн сэргэлт бодлогын хүрээнд орон нутагт хэрэгжүүлсэн үйл ажиллагааны үр дүнг 91.0 хувийн хэрэгжилттэйгээр дүгнэсэн.

Иргэдийн амьдрах таатай орчныг бүрдүүлэх хүрээнд ариутгах татуургын системийг бий болгох, эко 00-н шийдлүүдийг бий болгохоор төлөвлөж, санаачилга гарган ажиллаж байгааг онцолж байна. Мөн элсний нүүдлийг сааруулах, хуралдсан элсийг зөөх, чөлөөлөх, гудамж талбайг цэвэрлэх ажлыг тогтмол хийж хэвшсэн байна.

Өнгөрсөн онд нийт 28 иргэнийг шинэ сэргэлтийн бодлогын хүрээнд шилжин суурьшуулсан байна. Энэ нь нээлттэй Өвөрхангай хөтөлбөрийг үр дүнтэй хэрэгжүүлэхэд тодорхой хувь нэмэр оруулсан ажил болсон байна гэж дүгнэлээ. Цаашид шинэ сэргэлтийн бодлогын хүрээнд шилжин ирэгсдийг нэмэгдүүлэх зорилгоор сум, орон нутгаа сурталчилсан, давуу талаа харуулсан кино, контент богино хэмжээний шторк болон ярилцлага нэвтрүүлгүүдийг цувралаар хийж олны хүртээл болгох шаардлагатай гэж зөвлөж байна. Мөн шилжин суурьшигчдын сэтгэгдлийг сайн жишээ болгон олон нийтэд түгээж ажиллах шаардлагатай байна.

МОНГОЛ УЛСЫН ХӨГЖЛИЙН БОДЛОГО, ТӨЛӨВЛӨЛТИЙН БАРИМТ БИЧИГТ ТУССАН ЗАСГИЙН ГАЗРЫН ТЭРГҮҮЛЭХ АЧ ХОЛБОГДОЛТОЙ ТӨСӨЛ, АРГА ХЭМЖЭЭНИЙ ГҮЙЦЭТГЭЛИЙН ҮНЭЛГЭЭ

Засгийн газрын тэргүүлэх ач холбогдолтой төсөл, арга хэмжээг үнэлэх шалгуур үзүүлэлтийн биелэлт:

Засгийн газрын тэргүүлэх ач холбогдолтой төсөл арга хэмжээг үнэлэх шалгуур үзүүлэлтийн хэрэгжилтийг 90,0 хувьтай дүгнэлээ.

Энэ хүрээнд нэгдсэн хогийн цэгийг 20.0 сая төгрөгийн хөрөнгө оруулалтаар хогийн цэгийн байгаль орчинд үзүүлэх сөрөг нөлөөллийг бууруулж, эко орчныг бүрдүүлсэн байна. Цаашид анхан шатны эх үүсвэр дээр хогийг ангилан ялгах дадалд иргэдийн хандлагыг хэвшүүлэх, мөн хогийн цэгийн зохистой ашиглалтыг нэмэгдүүлэх, хянах зорилгоор камержуулах шаардлагатай гэдгийг зөвлөж байна.

Тэрбум мод үндэсний хөтөлбөрийн хүрээнд тарьж ургуулж байгаа мод бутууд нь 70 орчим мянга байгаа бөгөөд тэдгээр нь 92 хувийн ургалттай байгааг онцлууштай бөгөөд цаашид тарьж ургуулсан модны нэр төрөл, амьдралтын хувийг нэмэгдүүлэх, тарих үйл ажиллагааг мэргэжлийн түвшинд төлөвлөхөд анхаарах шаардлагатай.

Аймгийн хэмжээнд 2024 оныг цахим шилжилтийг дэмжих жил болгон зарласантай холбогдуулан оновчтой төлөвлөлтийг хийж, үр дүн гаргаж ажиллахад анхаарах шаардлагатайг зөвлөж байна.

ХЯНАЛТ-ШИНЖИЛГЭЭ, ҮНЭЛГЭЭНИЙ АЖЛЫН ХЭСЭГ